

Remitido:

KENDENAN TA CULPABLE?

Redactor, permiti mi un espacio pa mi trece lo siguiente pa dilanti:

Recientemente nos comunidad a bolbe wordo confronta cu un crimen caminda un turista a wordo ranca for di su bida riba un pida baranca cu mundialmente ta goza di un popularidad inmenso caminda hospitalidad, seguridad, amabilidad y cordialidad ta resalta.

E asunto a lanta hopi stof tanto nacional como internacionalmente.

Awor e pregunta cardinal cu nos tur cu ta stima e baranca aki mester haci ta: kendenan ta culpabel di e acto repudiable aki?

Querido concudadanonan, na mi concepto nos tur a faya: comunidad den su totalidad, mayornan di e muchanan aki y e hobennan mes.

Laga mi cuminsa cu e miembronan di prensa (tanto radio, prensa visual y principalmente prensa escrito), esnan cu a bishita mi pa ocho aña largo na conferencia di prensa por confirma locual mi a bin ta propone pa mas cu cinco aña largo kico por wordo haci pa frena e ilegali-



dad di cargamento di arma y tur e consecuencianan negativo y doloroso cu esaki ta trece cu ne.

Mi ta convenci cu mester bin razzia pero bon planifica y estructura.

Si e palabra ta zona fastioso, nos por simplifika y yame

'control severo'.

Pero algo den e direccion aki mester wordo haci cu frecuencia.

Pues esaki ta implica cu di Comisario di Polis te cu e aspirant-agent cu a caba di haya su entrada den Cuerpo di Polis ta subi caya por ehempel, di diabierna anochi te cu diabierna mainta.

E control severo aki mester socede inespera pero regularmente, pero naturalmente manera mi a bisa caba bon planea, estructura y cu bendicion di Ministerio Publico.

Pa ta bon nos fiscalnan tambe por subi caya y asina haya un mihor bista cu e trabao di polis den practica ta otro cu den teoria.

Nos tin hoofdagentnan, sub-inspectornan, inspectornan cu por encabesa gruponan di polis.

Despues simultaneamente controlnan mester wordo haci ROND DI ARUBA na localidadnan publico caminda tin sospecho cu actonan contra ley ta wordo ehecuta, por ehempel, prostitucion, consumo di droga, dealmento den droga, control riba arma di fuego, mihor control riba e barconan di fruta na waf, benta di alcohol clandestinamente, control riba ilegalnan, etcetera.

Mi ta ripiti, e controlnan aki mester bay bon planea.

Shonnan, nos por keda papia di awe te den siglo- y siglonan pero si no bin cu accionnan relampago, e asunto aki ta keda empeora.

Actualmente e asunto aki ta asina cu husticia ta cana atras, nos mester ta un paso dilanti di e criminalnan.

Ora Polis tene controlnanan

severo ta bon tambe pa prepara Huis van Bewaring na Dakota pasobra e lo yena cu hende.

Mi ta mira caba cierto hendenan cu señalnan riba nan cara di cu esaki no ta algo facil, MAKE IT HAPPEN.

Prome cu Status Aparte diferente biaha tipo di controlnan asina a wordo haci y nan tabata tin exito.

Laga mi splica mas profundo mi filosofia pa cu e control severo aki.

Den un comunidad caminda nos hende tin hopi libertad esaki automaticamente ta desemboca den libertinahe caminda normanan y valornan ta wordo ataca.

Factornan manera respet y disciplina na sufi pasobra cu nan ta stop di existi.

Esnan concerni ta sigui tolera e 'modus vivendi' aki y nan ta promove inconcientemente e actitudnan negativo di cierto miembronan di nos comunidad envez di frena esaki rigurosamente.

Mi ta duna un ehempel pa aclarea loke mi kier meen.

Durante temporada di Carnaval, cuanto biala no a pidi y suplica pa trece un cambio den e tantisima dianan cu Carnaval ta dura.

Bo ta haya un Cocojoco Jam, sigui pa Carnaval di Noord, Lightning Parade Tivoli y pa su mañan Carnaval di mucha.

Shonnan, kere mi cu tur e activadnan tras di otro ta duna oportunidad pa nos hendenan cu no por controla nan mes, consumi demasiado alcohol y kizas combina cu droga.

Si nos mira bon durante ultimo añanan ta hustamente durante e temporada aki nos a haya un asesinato.

Esaki ta un realidad cu tur hende cu tin e pida baranca aki na pecho NO POR DESBARATA.

Akinan no tin way back y ningun hende por trece otro banda di medaya relaciona cu locual mi a trece dilanti aki.

Mi sa tambe cu polis no por muestra 'machtsvertoon' y cu tin constitucion cu nos mester respecta.

Pero que hubo di e concuicadananon den comunidad cu ta biba un bida ehemplar?

Nan tambe tin derecho.

Na unda nan derecho pa biba den tur tranquilidad a keda? Na unda e frontera ta?

E asunto aki mester wordo frena masha tempo caba. E baca a hoga y awor a bira tempo pa actua cu man duro, esey polis ta wordo yama 'De Sterke Arm'.

Por ta cu tin hende den nos comunidad cu ta bisa awor cu mi a sali for di Cuerpo mi ta trece esaki dilanti.

Pero mi a sirbi e Cuerpo cu tur honor pa 28 aña largo y mi ta dispuesto pa participa na e razzia any time pasobra ainda mi ta sinti mi polis te den mi higras.

Mi ta dispuesto pa wanta tur e consecuencianan cu esaki por trece cu ne tambe.

Mi ta haci un yamada na Bond di Polis pa suplica nan miembronan pa no existi overtime si ta esaki ta e problema.

Ban haci esaki pa Aruba, nos baranca stima, e perla den mar Caribe.

Loke tambe mi ta kere cu mester socede ta cu mester bin programanan social-educativo caminda TATA Y MAMA ta wordo involvi pa asina conhuntamente nan cuminsa carga nan responsabilidad como mayor.

Nos centronan di bario cu hendenan cu ta traha na bienestar di nos hubentud pero desinteresadamente pues no pa saca probecho personal, por hunga un rol importantisimo den concientisacion di nos mayornan.

Si ta tempo ta stroba anto ora tin actividadnan asina, doño di trabao mester muestra flexibilidad y duna algun ora pa e tata y mama acudi na e actividad, TUR DOS MESTER TEY.

Si e doño di trabao no coopera e lo ricibi trempan o laat e consecuencia riba teblachi.

Di con? Pasobra den caso si algo pasa e yiunan su trahador no por funciona optimalmente y por ta te hasta ta kita for di trabao.

Mayornan mester ta na altura tambe cu kende nan yiunan ta anda y na unda nan ta bay.

Como mayor bo mester ta fuerte y controla bo yiu, no lubida: locual nos sembra awe, nos ta cosecha mañan.

Mirando cu awor Carnaval a pasa, ta bon pa durante e tempo di Cuaresma nos reflexiona y pone Dios nos dilanti.

Comisario di Polis y gobiernu no mester otorga ningun permiso pa tene fiesta publico.

Den un comunidad mester tin banda di libertad basa riba democracia tambe leynan cu ta guia un comunidad pa evita anarquia.

Mi ta spera cu e articulo aki lo yuda duna un man pa asina nos sigui combati e criminalidad.

Pueblo, sigui yuda Polis.

Shon Pe Krozendijk.

TA WAAK PA MUCHA

ariba Diadomingo tur edad Afl. 25,= pa dia. Pa mas informacion:

**Pasadia Infantil Beyisima,
Monserat 19C, Noord Tel:
60522**



JEUGD RODE KRUIS ARUBA

PA MEDIO DI ESAKI COMMISSION "JEUGD RODE KRUIS" EN COOPERACION CU "RODE KRUIS" TA PARICIPA NA TUR JOVEN INTERESA PA TUMA E CURSO DI:

**"JEUGD EHBO - A" (10 pa 12 aña di edad)
"JEUGD EHBO - B" (13 aña di edad)**

CU E DIA DI INSCRIPCION TA DIASABRA 24 FEB., 1996

HORA: 3:00 P.M. - 5:00 P.M.

ADRESS: CAS DI ZR. CICILIA, SANTA CRUZ (dilanti warda di Polis St. Cruz)

Pa mas informacion por yama tel: 52106 despues di 6:00 p.m.